

東

華

錄

東華錄

康熙七十六

臣王先謙敬編

臣周瀚蕃恭校

秋七月辛未以李法祖爲安徽布政使

由浙江按察使遷

○壬申河道總

督張鵬翮奏今夏淮黃並漲水勢洶湧以致古溝唐埂清水溝韓家莊四處隄岸漫缺得旨今春朕欲親閱高家堰張鵬翮奏稱隄岸工程俱完又時當炎暑蚊蚋正起求停止親閱懇奏再四朕以高家堰關繫甚大親往閱視見石隄尙有未完之處所下之埽已經二三年者朽爛亦多將此情形一一指示張鵬翮及河工諸臣朕又諭張鵬翮大水時發難以豫料爾務須晝夜防護至分守隄工人員委用不當朕亦諭及今古溝唐埂清水溝韓家莊四處隄岸衝決河工將有復壞之勢大小河員惟知清水暢流爲己功而

不知高家堰之六壩水洩太多則清水力微黃水必復倒灌也此事著九卿詹事科道速行會議具奏至田禾民舍有無淹沒之處著該督撫等各行速報 上問大學士馬齊曰此決口俟水一減卽星速開工今年可以完否馬齊奏曰補築零星之處年內可完若築決口年內未必能完 上曰數日朕爲茲事殊覺憂悶今春親巡南省山東運河之隄並未修築朕自江南還山東河隄已完以此揆之工作果勤所需日月亦無多也○丁丑以武國楹爲浙江按察使

由湖廣岳常道遷

○乙酉刑部議覆湖廣總督喻成龍奏湖廣

提標營兵王漢傑等聚眾搶劫應將王漢傑等擬斬監候其該管各官並不知情應免議查此案該督引律不合又不參劾該管各官應駁回得旨凡管理兵丁將弁必平素約束軍伍禁令嚴明兵丁始克遵法紀地方無事王漢傑等糾集三百餘人在城中搶掠

當鋪又於城外執旗蠶勒索府縣官印結該管將弁何得稱爲不知伊等所司何事況因此案已將總督提督等俱行治罪今喻成龍不知各營武弁讞審明白輒以並不知情徇庇具奏殊屬不合喻成龍著該部嚴加議處此案遣郎中吳進泰前往究審具奏○丙戌古北口提督馬進良奏請以昌平營參將吳開圻補授石匣副將王朝輔員缺 上諭大學士馬齊石匣副將之缺要職也參將吳開圻其人僅可而已不當授之張家口副將師懿德乃原任總兵官師帝賓之子人材健壯可用著調補又諭王朝輔甚可惜人材矯健所學亦佳遺奏皆其手書居官之善石匣兵民無有不稱之者至師懿德之父師帝賓人材亦矯健佛倫爲總督時密奏彼騎射不堪請劾之朕諭曰師帝賓謂之營伍不整或不可料如言其騎射彼爲三屯營副將時騎射之佳大臣侍衛皆知之不可

劾也佛倫終劾師帝賓而佛倫之名亦於此壞矣佛倫又密奏趙良棟不可使居甯夏乞召往京師居之後趙良棟來京朕命彼歸原籍趙良棟奏曰有人奏言不可令臣居甯夏臣不便歸故土因問何人所奏趙良棟言佛倫以其密奏告之索額圖而索額圖告臣以此觀之人之無信無恥未有如佛倫者矣凡督撫提鎮密奏之事皆朕親手密封發回朕躬之外卽左右人亦不得見隻字此皆體密奏者之心而重其事之意且一概密奏之事朕但使作好官愛百姓就彼所奏之事加之訓諭而已並未嘗一次批云保此人劾此人也佛倫自行密奏而反妄以告人是忘禍而樹仇矣猶可比之人數乎朕觀古來爲人臣者牽於黨類而僨事者多旣屬同事不知規諫但相咬慾而爲不良事何以濟馬齊奏曰聖諭誠然皇上至公無私是以處事皆當理大小臣工多私是以凡

事失宜而不良之人又與之爲黨事無不僨矣 上諭曰李光地受朝琦楊名時之累張鵬翮受王謙等之累皆此故也今張鵬翮所用之人皆不可用河工甚要爾等宜留意馬齊奏曰張鵬翮所用之人並不諳河務緊要之事仍須殷寶旗員始能倉卒立辦上諭曰凡人必試之而後知張鵬翮多疑今卽遣旗員前去未嘗一試而張鵬翮早疑其不清人亦何心爲彼效力夫高家堰之隄全當洪澤湖之水開六壩雖民田畧有衝沒淮揚地方斷無可虞如以爲利益民田而閉六壩萬一大水驟漲而隄決淮揚大有可虞矣是以前總河靳輔開六壩以注水張鵬翮但知閉六壩則運河民田均有益而不知爲淮揚之大患高家堰之所關甚爲緊要也○辛卯九卿等遵旨議覆今年伏汛水漲衝決古溝等處隄工皆由河道總督張鵬翮平日徇庇延緩自執已見所致應交吏

部嚴加議處從之

八月甲午免八旗借支兵餉銀七十萬兩○諭大學士等向來滿洲無犯法殺人之事康熙初年一年之內最多不過一二件而已自平吳三桂滿洲殺人之事漸多五年前至每月七八件朕謂若不力禁斷不知改自定爲新例又將都統副都統佐領官一併治罪是以去年僅有三件今年僅有一件由是觀之則知法嚴而人命之事自少矣○丁未京師地震○己酉吏部奏湖廣總督喻成龍於兵丁王漢傑等聚眾搶掠一案徇庇該管將弁蒙混具奏應革職得旨喻成龍著革職○丁巳 上駐蹕古爾班庫德爾賜來朝諸藩銀幣鞍馬及隨圍喀喇沁官兵銀幣○戊午以石文晟爲湖廣總督由廣東巡撫遷○庚申 上自博洛和屯啟行閱各處犂生馬牛羊羣及編入左翼四旗察哈爾巴爾虎厄魯特各蒙古生業

諸蒙古皆列廬帳攜婦子捧羊酪等物跪於道側迎駕察哈爾蒙古奏曰累世受 皇上天高地厚之恩馬與牛羊皆得蕃息男女老少俱享安樂於盛世巴爾虎蒙古奏曰我等係絕域微末之人蒙 皇上收恤養育又無差徭今各得其所矣厄魯特蒙古奏曰我等原係負罪不赦之人蒙 皇上如天好生特爲免死又沛洪恩編入旗伍安插牧地賜以牲口五六年閒牲口蕃息生計豐饒隆恩如此不能仰報於萬一也

九月乙丑賜從官馬及牧羣察哈爾巴爾虎厄魯特等銀幣○丙寅理藩院奏和托輝特旗下所屬穆庫爾等請以故貝勒根敦戴青養子博貝承襲父爵議不准行得旨根敦戴青貝勒之爵曾襲與伊親子松津僧額松津僧額病故已將其嗣子博貝從侍衛授扎薩克一等台吉管本旗事矣今屬下人員又叩請以博貝承襲

念根敦戴青向者征噶爾丹甚爲效力著授博貝爲輔國公○丁卯吏部奏河道總督張鵬翮於河工事務並不盡心豫爲籌畫以致隄岸衝決殊屬溺職應革職得旨張鵬翮著革職留任○丙子上還京師○庚辰工部左侍郎色德禮以病乞休允之○壬午兵部議覆原任湖廣總督喻成龍奏湖廣南北各土司子弟中有讀書能文者注入民籍一同考試從之○癸未 上御經筵○甲申以希福納爲左都御史由吏部右侍郎遷○以范時崇爲廣東巡撫梁世勳爲山東布政使葉九思爲山東按察使由直隸巡道遷○乙酉以杜敏爲吏部右侍郎由一等侍衛遷○轉穆和倫爲工部左侍郎調巢可托爲工部右侍郎由盛京州部侍郎調○是月免江南泰州湖廣沔陽等二十七州縣衛水災額賦有差

冬十月辛卯朔重修華陰西嶽廟成

御製碑文○甲午諭工部

東南要務莫重於河防自兩河衝決黃流淤墊繼以高堰唐埂六壩久決未塞而洪澤湖水從決口旁洩致淮水力弱黃水倒灌全河幾至潰壞於是分遣廷臣發帑金數百萬增築高堰盡閉六壩俾淮水全注清口又特築挑水壩以偏黃溜趨向北岸仍開濬陶莊引河以導黃北流然後黃水無倒灌之患康熙四十二年以河工漸可底績躬親臨視時高堰石工尙多未竣飭令迅速修築又因仲莊閘水勢湍急恐偏黃流倒灌清口遂命閉仲莊閘改建楊家莊閘閘工旣成今年春復往巡閱比至高堰見石工仍有未完舊埽亦多朽塌諄諭河臣張鵬翮謂水勢無常修防宜豫一有疏忽則前功盡隳且甫奏安瀾旋報衝決天下其謂之何張鵬翮猶奏稱隄工捍禦可以無虞迨伏汛大水驟發果衝決古溝唐埂清水溝等處淮揚一路田畝被淹者甚眾今已嚴飭堵塞決口剋期

竣工朕屢親蒞河干詳度形勢當水漲之時若高堰及運河減水壩宣洩則閭閻隴畝必致淹傷方春水涸民間盡皆播種一經夏水驟漲開壩放流而所播之種悉被淹沒朕心惻然殊爲不忍使不設法導流俾水有所收束則瀕河及下河民田究不免於水患朕再三籌畫宜於高堰三壩之下挑濬一河兩旁築隄束水入高郵邵伯諸湖湖外亦量築土隄不使漫溢其高郵減水壩下亦挑濬一河兩旁築隄束水由串場河入白駒丁溪草堰等河白駒等河淤淺之處並開濬深通俾之入海如此則各壩所出之水不至有渙散衝流之害又洪澤湖水勢大漲泗州盱眙等州縣俱被水災應於泗州一帶受水之地亦酌量築隄束水毋令汎濫則所全於淮安揚州鳳陽三郡民生者多矣此事原於河道無涉在河官止知保護河道不復詳計民生朕惟民間田畝所繫甚重宜圖萬

全可久之策築隄束水行之北河業有成效則施之南河當亦有

濟應從何地築隄延袤若干里需費幾何行令江南江西總督漕

運總督河道總督江蘇巡撫會同確勘詳議具奏○丙中以布爾

賽爲盛京刑部侍郎

由左副都御史遷

○丁酉刑部左侍郎蘇赫納兵部

左侍郎布雅努俱以老病乞休允之○辛丑諭大學士等甘肅布

政使朝琦山西按察使巴哈布聲名俱不佳著來京以旗員用○

甲辰轉滿闡爲兵部左侍郎以殷特布爲兵部右侍郎魯瑚爲刑

部右侍郎

俱由內閣學士遷

○乙巳大學士等奏請決囚

上曰今年情

實罪犯少著停止處決情有可矜各犯著分別覈議照例減等發

落再各省秋審尙無可議朝審則太寬書云罪疑惟輕以其罪之

情由有可疑之處而輕之也若無可疑則以公平爲貴見在殺人

之人情罪顯然又何所疑而欲從寬乎執法之人但當詳情據理

以定罪一味從寬則惡人何所儆戒可以此諭刑部○戊申以鄂

岱爲甘肅布政使由御史遷○壬子以舒圖爲內閣學士由內閣侍讀學士遷○

甲寅以舒赫德爲山西按察使由郎中遷○丁巳以董國禮爲左副都

御史由盛京禮部理事官遷○是月免直隸保安江南壽州廣東高要偏沅

岳州等十八州縣衛水災額賦有差

十一月辛酉朔以二高爲內閣學士由詹事遷○授散秩大臣丹濟拉

爲扎薩克輔國公往推河策零旺布所居地駐紮同內閣侍讀學

士殷扎納探聽策妄阿喇布坦信息如有舉動調附近喀爾喀兵

馬防禦之○己巳吏部奏補授大學士吳璵員缺 上曰吏部尙

書兼管直隸巡撫事李光地居官甚好才品俱優授尙書年久著

升爲文淵閣大學士江蘇巡撫朱榮操守好不生事任巡撫年甚

久著升爲吏部尙書○調趙宏燮爲直隸巡撫由河南調○壬申大學

士等以鄂羅斯貿易來使齎至原文及翻譯之文進呈 上諭大學士等此乃喇提諾托多烏祖克鄂羅斯三種文也外國之文亦有三十六字母者亦有三十字五十字母者朕交喇嘛詳考視之其來源與中國同但不分平聲上聲去聲而尙有入聲其兩字合音甚明中國平上去入四韻極精兩字合音不甚緊要是以學者少漸至棄之問翰林官四聲無不知者問兩字合音則不能知中國所有之字外國亦有之特不全耳○癸酉大學士等以蠲免湖廣錢糧 上諭進呈 上問曰曾查此數年蠲免錢糧數目否馬齊等奏曰自康熙四十二年以來蠲免錢糧數目一千六百餘萬 上曰自吳三桂變亂之後民甚艱苦故朕累年蠲免錢糧民生優裕則國家太平矣爾等可查康熙元年以來所免錢糧總數來奏尋大學士等奏查自康熙元年以來所免錢糧數目共九千萬

有奇報聞○諭戶部朕宵旰勤民廩思恩養惟務簡徵寬賦以期實惠黎元閒有州縣水旱不登卽詔所司亟議蠲賑其直隸各省各歲應輸額賦有以次遞蠲者有頻蠲數年者有將帶徵積欠暫令停徵者凡以蠲除額賦專爲小民樂業遂生一歲以內足不踐長吏之庭耳不聞追呼之擾庶幾休養日久馴至家給戶足而民咸得所也曩者楚省錢糧雖屢行豁免今已歷數載未經特蠲應將該省額賦全免一年以示朕加恩優渥之至意湖北湖南康熙四十五年除漕糧漕項外其餘地丁銀米一概免徵舊欠未完者並停輸納爾部移文該督撫令各飭屬員張示徧諭窮鄉僻壤咸使周知儻有不肖官吏於額徵之外巧立名色別有科派私圖肥己者察出定治重罪○甲戌國子監落成 御書彝倫堂額○丙子工部議准河道總督張鵬翮奏王公隄當全黃大溜急宜建壩

築隄以固河防從之○戊寅九卿議覆差往江南審事戶部尙書徐潮等審革職山安同知佟世祿復行叩閭告河道總督張鵬翮一案一議張鵬翮巧飾供詞失人臣禮應革職但係革職留任之員無庸議解任淮揚道王謙附會張鵬翮蒙混巧飾山安同知裘陳珮欺隱實賠銀兩俱應革職杖徒佟世祿任內並無誑支庫銀遲誤工程之處應復原職又一議工部右侍郎趙世芳議張鵬翮奏銷錢糧浮冒十三萬餘兩應革職拏交刑部審結餘如前議上曰此案依前議張鵬翮量甚窄斷不肯認錯河工錢糧原不限數或一年水大則所需錢糧多水小則所需錢糧少謂張鵬翮小有所取亦未可知謂以十三萬錢糧入己必無之事也張鵬翮自任總河以來未嘗一遇大水今年黃水雖長而淮水未嘗長儻淮黃俱長豈能無慮乎河工恃乎用人用人善則何事不成張鵬翮

所用之人皆不勝事始至此也王謙裘陳珮等擬徒俟伊等賠銀償完之日具奏治罪趙世芳奏事不公本發還聞趙世芳爲人好事而剛愎如此等人不利於事○河道總督張鵬副奏臣遵旨閱看隄岸衝決民舍田地淹沒之處因五六月雨水連綿故致淹沒入七月後天晴水消漫口堵完高地涸出二麥已種房舍修理安堵又丁溪迤下洩水入海甚速低田皆涸春耕有望下所司知之○己卯以工部右侍郎趙世芳爲鑲紅旗漢軍副都統○庚辰

上謁 陵啟鑾○以汪灝爲河南巡撫由內閣學士遷調于準爲江蘇巡

撫以陳誥爲貴州巡撫由左副都御史遷○御書程氏正宗額懸楊時

祠與學清節額懸羅從彥祠中和氣象額懸李侗祠霜松雪柏額

懸胡安國祠紫陽羽翼額懸蔡元定祠學闡圖疇額懸蔡沈祠力

明正學額懸眞德秀祠○乙酉 上謁 暫安奉殿 孝陵至

仁孝皇后 孝昭皇后 孝懿皇后陵奠酒○丙戌 上巡幸近

塞○戊子設雲南廣南麗江二府學官置生員許土人應試

十二月甲午以王之樞爲內閣學士由少詹事遷周清原爲左副都御

史由太常寺卿遷○辛丑 上復謁 暫安奉殿 孝陵○以裕親王福

全觀至黃花山遣諸王子大臣侍衛等往迎奠酒○壬寅裕親王

福全安葬 上親臨奠酒舉哀○以阿璽泰爲盛京戶部侍郎由盛京

京兵部理事官遷○甲辰諭大學士馬齊理藩院尙書常舒奏對時舉止

輕忽殊失大臣體著革退這員缺以領侍衛內大臣公阿靈阿兼

管○己酉 上還京師○增四川重慶府同知一榮昌南川二縣

典史各一裁夔州府同知一朝天白市二驛驛丞各一○命賚宗

室貧乏者○辛亥諭大學士等今年順天鄉試聲名不佳人或怨

其不公又聞試卷不加圈點者甚多應試者各執落卷以示人又

作草人至試官家門砍之觀其舉動人怨殆不可言矣果不圈不點可謂之閱卷乎想汪霽等亦無詞以對也朕在避暑處點汪霽姚士藹爲正副考官以爲出人意料朕親手封發當不復生弊矣由此觀之亦不在此但存乎其所行而已科場之設以爲選擇人材之地於此事而行之不正雖學問優長何益之有汪霽姚士藹著解任以其考試聲名問九卿詹事科道至科道官乃朕倚爲耳目而用之者也專在言職考官不閱試卷考試不公何不參劾亦將此問科道官尋大學士等遵旨以汪霽姚士藹鄉試事問九卿詹事科道等據九卿等云汪霽等考試不公不閱卷人皆怨之是實據科道云聞怨汪霽之言但無實據是以未曾糾參上曰科場之事關繫重大其弊不可不除朕於此事大加詳慎著將汪霽姚士藹交該部嚴加議處○以彭會淇爲工部右侍郎

由內閣學

是歲朝鮮琉球來貢○人丁戶口二千四十一萬二千五百六十田地山蕩畦地五百九十八萬八千九百三頃五十二畝有奇徵銀二千七百四十一萬六千六百六十八兩有奇米豆麥六百九十七萬一千一百二十三石有奇草二百八萬一千六百九十三束茶十五萬七千四百十二引行鹽四百三十一萬九千四百七十五引徵課銀一百六十九萬七千二百一十八兩有奇鑄錢二萬三千八百六萬五千九百有奇

東華錄

康熙七十七

臣王先謙敬編

臣周綸蕃恭校

康熙四十五年丙戌春正月己巳九卿議覆江南江西總督阿山等奏 皇上軫念國計民生特頒訓旨於高家堰三壩下挑河兩岸築隄束水入高郵邵伯湖其高郵州減水壩下亦挑河束水由串場河入白駒等河入海泗州一帶被災地方亦築隄束水不使泛溢竊查高家堰三壩其中隄相近見有唐漕等河應於三壩下各開引河一道兩岸築隄引水至唐漕河入寶應湖又查高郵運河減水壩之水自車邏等壩由馬飲塘入運鹽河出頭閘由興化之車路白塗海溝過串場河下丁溪草堰白駒閘入海除海溝河見今深闊直達白駒閘不必開濬外應將車路河白塗河淤淺之

處開濬深通俾之入海但高郵減水壩三座口門計寬一百八十丈丁溪草堰白駒等閘口門僅寬十一丈九尺恐一時異漲宣洩不及應自馬飲塘頭閘口分水使北入廣洋湖至射陽湖下海再於泗州之西溜淮套開河使淮水分流兩旁築隄至黃家堰與張福口水合使出清口此工開成則淮河水勢既分不但泗州盱眙積水消滅而洪澤湖之水不致泛溢亦可有利於高家堰而漕糧商民船隻可免洪澤湖風波之險矣又查運河水漲時清江浦及淮安隄工猶有可虞應於文華寺地方開引河至運河水長之際使之分流自楊家廟由白馬湖楊家溝入清蕩湖至淮安城南所有濶河原係引運之河今當挑深其濶河下所有清溝河於康熙三十五年被黃水淤墊濶河之水流去者少淮安城內外積水尙出不盡應挑通此處使由蝦溝口入海以上諸工約計需銀一

百八十八萬餘兩事關重大伏祈 皇上親臨指示等語伏惟河

工重大需餉浩繁上下兩河之工相距數百里所稱枵輿溜淮套一工其中情形尤難詳晰不但臣等愚昧不知卽該督等亦見識淺鮮不能酌議恰當若非 皇上親閱指示實難成功臣等公同叩請應如該督等所奏祈 皇上親臨河上指授方畧 上曰朕

屢經躬閱河道凡河工利病地方遠近應分應合應挑應築之處知之甚明邇者數次南巡瀕河官民不無勞擾因此朕不必親往閱視阿山桑額張鵬翮等所看已屬周晰但此項工程不應交與總河修築應多派大臣官員分工速修著再加詳議具奏○癸酉九卿會議高家堰三壩下挑河築隄應如該督所奏興工其督工開列文武大臣俟 皇上簡選派出遣往至分工各官聽督工大

臣簡選引見帶往仍仰祈 聖躬親臨河上指授方畧 上曰九

卿之議謬矣此河應開之處朕前已詳閱輿圖所見甚明旣無所疑往閱何爲但該督等料估錢糧數目太浮宜令覈減爾等會議但言當照該督等所勘興工並未開明如何動工及需用人夫之處所議草率著再議具奏九卿等覆奏 上諭極是此工緊要非臣等所能灼知雖再議亦無端緒務求 皇上親行始於事有濟上不允九卿等又奏 皇上屢次親臨河上不避風雨閱視隄岸原爲萬世生民計也今所議河工關係甚鉅務求 皇上親臨指授方畧 上曰朕不往巡亦因灼知地利之故朕爲河務再四思維其他處河道開濬尙易惟開溜淮套需餉浩繁若果有益於民見在帑金充裕用一二百萬兩非朕所惜爾等其卽議結具奏○己卯諭大學士等朕昔親臨河上欲往閱下河因張鵬翮奏言斷不可往是以中止今卽去仍然不能親莅其地則亦何事復往

但河工錢糧斷不可交地方官當照山東賑饑之例將八旗官及部院官內有行止端正者令該旗大臣及部院堂官多行保舉派出再將江甯鎮江杭州駐防旗員亦著該將軍副都統保舉派出或副都統或協領帶赴工上其京城派出官員領戶部錢糧帶往各省派出官員各就近地領錢糧帶往可派大臣督理工程所派官員每人各給三千兩務令照三千兩工價分地開工如此始得河務速成有利民生著九卿再議具奏至高家堰隄工若不豫行修治必有可虞已有旨諭張鵬翮而彼堅稱斷斷無慮若今年不修治高家堰儻有衝決卽開河何用此兩事中高家堰尤爲緊要爾等可將諭旨付挑河大臣轉交張鵬翮一併議奏○壬午九卿等覆奏挑河事宜 上曰爾等所議尙有未詳至將情願往河工效力者名爲捐助及其後皆無實際所欠銀兩皆朕豁免況前去

人員亦甚放縱今挑河之事俱有丈尺稍有不實卽誤公務而前去人員若行放縱尤貽害於地方爾等於嚴行禁止之處並未議及著再議具奏○乙酉九卿議奏高家堰三壩下及文華寺地方挑河建閘築隄又澗河清溝蝦溝挑河等工約估銀五十八萬九百兩零保舉八旗部院官共一百四十四員俱令引見江甯鎮江杭州駐防官共四十九員各撥副都統一員協領二員帶往協同監工其督工部院堂官伏候簡用速往興工京城官員領戶部庫銀江甯等處官員各於本省藩庫領銀每員派定三千兩計工均估務照式樣節省修築若招搖生事怠緩遲誤督工大臣及該督撫參奏嚴加議處有徇情隱庇事發將原保大臣督工大臣總督巡撫一併嚴加議處其雇倩人夫採買物料派地方官一同料理工完之日交總河防守至溜淮套開河需銀一百三十九萬餘兩

約畧估計甚屬浮多應交該督等覈減具奏另行請旨得旨依議
著孫渣齊徐潮鐵圖赫甲達爾華蔡毓茂前往督工○己丑吏部
遵諭議覆順天鄉試正考官戶部右侍郎汪霜副考官贊善姚士
鼐取士不公應均照溺職例革職永不敘用從之○是月免江南
上元等二縣上年水災額賦有差

二月庚寅朔以楊瑄爲內閣學士

由少詹事遷

○壬辰刑部議覆差往

湖廣郎中吳進泰等察審提標兵丁搶掠當舖一案爲首之王貴
等應斬立決爲從之王漢傑等俱應斬監候原任布政使今升太
僕寺卿施世綸原任按察使董廷恩見任布政使董昭祚按察使
郎廷棟等俱應革職提督俞益謨應降二級調用上曰湖廣兵
丁原多良善後因武臣不能約束流弊至此豈可不嚴加懲治且
地方官不將此案審明延捱推諉朦朧具奏殊爲不合著將兵丁

首犯王貴等依擬立斬從犯王漢傑等俱依擬應斬監候秋後處

決施世綸董廷恩董昭祚郎廷棟等俱著革職提督俞益謨居官

好且在事發之後到任著降二級從寬留任○癸巳 上巡幸畿

甸啟鑾○戊戌浙江巡撫張泰交以病乞休允之○以汪晉徵爲

戶部右侍郎由左副都御史遷○辛丑先是擒厄魯特噶爾丹之子塞卜

騰巴爾珠爾至京 上赦其罪授一等侍衛至是命阿達哈哈番

覺羅長泰之女照鎮國公女例授爲鄉君妻之授塞卜騰巴爾珠

爾爲鎮國公壻○丁未 上次靜海縣閱子牙河隄○辛亥諭大

學士等侍郎阿璽泰派修馬家口隄工竟不在工所又不候駕於

減水壩殊不稱職著革去侍郎仍在河上效力○壬子 上還駐

南苑○甲寅以江蘩爲左副都御史由宗人府府丞遷王然爲浙江巡撫

由廣西布政使遷○丙辰京師地微震○丁巳詔羣臣言事修省闕失○

刑部議覆江南江西總督阿山奏參江甯府知府陳鵬年不將

聖訓供設吉地大不敬應將陳鵬年立斬得旨陳鵬年著革職從寬免死來京在修書處效力○戊午 上還宮○是月免江西新建等四縣上年水災額賦有差

三月己未朔以董國禮爲盛京戶部侍郎

由左副都御史遷

滿普爲陝西

按察使

由給事中遷

○福建巡撫李斯義奏報臺灣鳳山諸羅三縣旱

災 上諭大學士等臺灣地方窪下一遇亢旱卽至歉收著將臺

灣等三縣糯米全行免蠲朕莅政四十餘年留心諸務無所不悉

見窪下之地旱則不收水亦鮮穫不若蒙古田土高而且腴雨雪

常調無荒歉之年更兼土潔泉甘誠佳壤也○庚申 上御經筵

○壬戌大學士戶部議覆據直隸巡撫趙宏燮天津總兵官藍理奏若將直隸所屬荒田及下窪地開墾爲水田實萬世無窮之利

請以江南等省軍徒人犯安插天津照丁給田令其開墾應交與該撫等將直隸可以墾作水田之地一概查明令其開墾江南等省軍徒人犯無多應不分旗民南北之人有情願開墾者亦令照丁給與如有用官員捐助牛種耕種者三年後升科如自備牛種耕種者六年後升科其田給與開墾之人爲業該撫等將每年所墾田數查覈奏聞 上曰此事著暫存貯可令藍理於天津試開水田俟冬後再以此事奏聞 上又曰此處水田不比江南與甯夏澤州等處相似大都恃開溝以引河水今直隸河道處處俱通若開通三河縣河亦可直抵薊州今朕欲挑濬清河此河一開於右翼人眾亦大有利益也○甲子九卿等遵諭議覆一切政務皆經 聖心裁酌次第舉行至詳至當實無應行更改之事且目前節候方屆春深 聖懷如此殷切自當上召天和大獲甘澍臣等

奉職無狀愆過甚多自今惟有交相儆戒精白此心仰副 皇上
諄諄訓迪至意 上諭朕總理幾務甚久茲年歲日益夙夜乾惕
與日俱增自去冬無雪及今春深尙未得雨地氣熯燥不和又雲
色多細縷狀朕知之旣晰豈可不降諭旨此非僅無雨且恐別有
異災與其有災異而後講求不如君臣於未事之先將政事得失
引爲己責竭誠據忠詳加計議之爲當也但數語頌揚虛言省改
未可卽以塞責夫民爲邦本食爲民命朕自東作以至收穫廩念
靡甯迨秋成以後豐歉旣定然後此心少釋別爲計畫爾等俱係
大臣或司言職事有缺失各宜直陳這所議未詳盡著再行確議
○丙寅九卿等復遵旨回奏今春稍愆雨澤上廩 宸衷深加儆
慮皆由臣工奉職無狀致陽春氣候失調惟有自今以後滌慮洗
心交相砥礪爲大臣者果見部院事例或有未當毋得因循憚改

務竭公忠體國之誠居言路者果見吏治民生或有未宜毋得緘默苟容務盡嘉謨獻納之實儻有營私玷職尸位素餐卽立賜處分以爲曠官之戒得旨所奏已悉○諭大學士等朕觀前史如漢朝有災異見卽重處一宰相此大謬矣夫宰相者佐君理事之人儻有失誤君臣共之竟諉之宰相可乎或有爲君者凡事俱付託宰相此乃其君之過不得獨咎宰相也康熙十八年地震魏象樞云有密本因獨留面奏言此非常之變惟重處索額圖明珠可以弭此災矣朕謂此朕身之過與伊等何預朕斷不以己之過移之他人也魏象樞惶遽不能對當吳三桂叛時索額圖奏云始言遷徙吳三桂之人可斬也朕謂欲遷徙者朕之意也與他人何涉索額圖悚惶不能對朕之生平豈有一事推諉臣下者乎至於巴圖魯公鰲拜過必隆爲圜地事殺尙書蘇納海總督朱昌祚巡撫王

登聯冤抑殊甚此等事皆朕所不忍行者朱昌祚不但當殺並不當治罪也朕覽世祖皇帝實錄陳名夏劉正宗魏裔介等展轉參劾此皆明代之流習互相攻訐此等惡風不可長也○九卿議雲南貴州廣西四川四省員缺若本省無應委署之員則委鄰省附近官暫令署事俟部選官到日仍回原任上曰如此議則官員到任仍至遲延令鄰省官署事則鄰省官少又至懸缺當照年滿千總分發各省候缺著將此四省見出知府以下員缺俱行察明單月掣籤補用至候補官員論省之大小缺之多少一省或十五人或二三十人均勻配算六歸單月一年一次掣籤分遣俟有缺出著該督撫指名挨次補授一面報部如未有缺出暫給俸候補如此則員缺不至久懸於事有濟矣○丁卯以郭璘爲左副都御史由太僕寺卿遷○戊辰上致齋命禮部禱雨○庚午諭大學

士九卿等雲南巡撫佟毓秀先任布政使時尙優簡授巡撫以來居官不善著調回京另用上問戶部侍郎巴錫曰爾向不曾薦佟毓秀爲賢耶巴錫奏曰臣昔在雲南與佟毓秀同事七閱月見其辦事甚勤是以臣奏稱其效力上曰朕凡有所問必當諸臣之前爾在眾人前稱奏佟毓秀之賢今但言曾奏其效力待君之體可如是乎豈效力不謂之賢將不效力者謂之爲賢乎○辛未以席爾圖爲盛京工部侍郎由通政使遷○乙亥以雨未霑足復致齋祈禱○庚辰上御乾清宮西暖閣讀卷官等以殿試卷呈進上諭讀卷官等朕考試八旗舉人騎射僅八十餘人卽取中進士十餘人未免太過漢人舉人數千人僅取中一二百名進士凡事當以均平爲善而條陳者但言增額不言減額爾等定議具奏又諭朕往江南閱河擇彼處生監善書者令隨至京師赴鄉試而主

考汪彥有心將此輩試卷另設一處既不閱文而屢請展期此卽存私也凡試官當論文之優劣遑計其他耶又諭數科以來狀元俱不甚佳韓莢學問雖優而不自檢飭頗好飲酒爲禮部尙書時司官筆帖式俱藐視之王式丹亦不檢飭而且懶惰但所學尙優耳 上親定一甲三名又閱不合式十一卷文理謬劣陶仁明馬芝秀兩卷諭曰陶仁明著黜革馬芝秀仍留舉人其十一人令再三年殿試著大學士等會同都察院並工部尙書溫達取陶仁明等硃墨卷校對並傳試官來問又諭此外尙有不堪者爾等再行察出諸臣隨又察出張勿我郭璜二卷進呈命皆黜革○辛巳賜施雲錦等二百八十九人進士及第出身有差○甲申以劉蔭樞爲廣東布政使由雲南按察使遷○丙戌左都御史吳涵以病乞休允之○左副都御史周清原奏請直隸各省建立育嬰堂以廣 皇仁

從之○丁亥大學士都察院及工部尙書溫達等遵旨察議會試主考官李錄子彭會淇同考官李紳文謝藩閭中寬等以陶仁明等四人不堪試卷取中進士不可謂之無弊擬李錄子等離任李紳文等革職會同刑部嚴審上諭朕觀會試正考官係北人則必取北人爲首係南人則必取南人爲首可謂之無私乎今年科場行賄者想亦無有但中所不當中故人心不服陳廷敬奏曰閱會元文章首篇一千二百餘字文亦不佳向來作文不得過六百五十字所作違例豈可取中乎不善衡文是以致此會元尙居易亦應黜革上曰爾等察議甚當如所議行○偏沅巡撫趙申喬奏布政使董昭祚按察使郎廷棟俱於湖廣兵丁鼓譟案革職但伊等居官勤慎廉潔懇請留任俾圖後效得旨董昭祚郎廷棟俱革職從寬留任○是月免福建臺灣湖廣華容等五縣上年被災

額賦有差

夏四月戊子朔日有食之○辛卯諭兵部國家綏靖疆圉安輯軍民惟專閫元戎是賴有實能久鎮邊境懋著勞績者則獎勵酬庸宜踰常格貴州提督李芳述自歷行閒二十餘載屢立戰功及黔省莅事以來御軍有法訓下知方威望蔚聞謀猷益殫矧年稱耆宿見今舊將閱歲之久罕與媿倫用沛殊恩特彰優異著加太子少保授爲鎮遠將軍以示朕褒寵勞臣至意○癸巳以郭琰爲雲南巡撫

由左副都御史遷

李濤爲廣西布政使

原任○乙未以梅鋐爲左都

御史

由兵部左侍郎遷

○己亥大學士戶部議舊小制錢錢價甚賤不便

於民奉有諭旨應暫動支戶部庫銀十萬兩由戶部差官會同五城御史收買舊制錢俟錢價既長奏聞上曰欲平錢價此外更有良法否大學士等奏曰民間收買之說錢價卽少昂以此揆之

此法甚善 上曰朕細思之此外更無良法今錢價賤者皆私錢多之故也果欲力禁私錢何難之有明代尙能行紙鈔豈有不能禁私錢之理但與其嚴行禁止毋甯和平處置在京收買准爾等所議至天津臨清地方亦當遣賢能官各一員卽交該地方餉銀各一萬兩收買專差侍郎穆丹督買視錢價貴後不時奏聞又聞山陝兩省販去大制錢甚多著行文山陝直隸巡撫查察緊要關口嚴令擒拏如被獲時將販運之人從重治罪毋得輕恕○九卿等遵旨議覆雲南貴州廣西四川四省官員空缺甚多嗣後知府以下知縣以上員缺凡候選人員內有願往效力者遞呈之後令彼掣籤雲南廣西各二十二員貴州十五員四川四十員豫先遣往缺出則該督撫照名次補授如無情願效力者則令雙單月投供者掣籤遣往俱於每年五月初十日內掣籤 上曰此議未當

向因四省員缺規避者多故嚴立條例恐猶有規避之人爾等乃

議定月分掣籤必生巧託規避俟五月四省員缺選完之後然後

投供此事不可限定月分每年自正月起投供官員到齊後卽來

請旨俟朕命下使彼掣籤如此則不能規避矣○辛丑以募成額

爲左副都御史

由郎中遷

李華之爲貴州按察使

原任湖北按察使

○雲南巡

撫佟毓秀奏參布政使佟國勳貪劣命革職提問○甲辰禮部遵

旨議減八旗進士額數仍照康熙二十六年舊例滿洲蒙古取中

四名漢軍二名從之○丙午予故內閣學士南塔海祭○己酉以

張聖猷爲雲南按察使

原任

○辛亥湖廣總督石文晟奏參容美土

司田舜年私造宮殿暴虐姦淫不法各款

上諭大學士等頃湖

廣總督石文晟劾奏土司田舜年縱恣不法昔吳三桂之亂田舜

年畧無舉動卽此一端甚爲可嘉今石文晟有此劾奏或因田舜

年與地方官不協所致其中恐有虛誣此摺暫停批發○轉王九

齡爲吏部左侍郎以張廷樞爲吏部右侍郎由內閣學士遷○以周清原

爲工部右侍郎

由左副都御史遷

○乙卯轉曹鑑倫爲兵部左侍郎以蕭

永藻爲兵部右侍郎

由廣西巡撫遷

○丙辰湖廣總督石文晟奏容美司

土司田昞如乃貪庸惡劣被參革職拏問之人今據桑植宣慰司

土司向長庚詳稱田昞如主僕二人逃在伊處及臣屢次檄行解

審而土司向長庚竟不將田昞如起解反捏稱田昞如臥病不能

前往至原任土司田舜年旣將伊子田昞如奏參革職理應將伊

子正妻所生長孫申詳襲職今該土司報稱康熙四十年已將長

孫田宜男名字報部其時田宜男年方十二歲不久病故因田宜

男名字乃祖父所命不忍改易故將次孫仍名田宜男今實七歲

如開送確實年歲恐部駁查據此田舜年明有欺隱誑報之罪

上諭大學士等石文晟前劾土司田舜年何不同此摺一併具奏

乃作兩次參劾又摺內不言兩巡撫專請交提督審問此必有故
從前吳三桂自水西烏蒙土司地方進取雲南因知其地產銀遂
於康熙初年奏請進剿水西後得其地分爲四府我軍於是役亦
大有損傷今此事雖小斷不可生事爾等將前後奏摺及土司呈
詞鈔發偏沅巡撫趙申喬湖廣提督俞益謨令其不必會同商議
各出己見作速具奏○丁巳以高必宏爲雲南布政使

由江蘇按察使遷

五月戊午朔工部議河道總督張鵬翮修理攔河壩不用葦蕩營
蘆葦而用帑銀採買其奏銷之案應駁回 上諭大學士等前者
總河靳輔等俱將河上所有蘆葦令葦蕩營兵割取運往備用今
張鵬翮用人不當不能運致蘆葦朕每南巡見張鵬翮如有緊急
工程卽鼓舞旗員兩三日內運致物料完工許以事成定保奏後

仍保舉漢官是以人皆意沮夫人盡力辦事而薦揚不及誰復肯爲效力朕去歲視南河時曾於眾人前言高家堰隄工不堅尙應增築張鵬翮對以河工已竣斷然無害朕謂爾雖言工竣朕不能信及後隄工潰決幸是唐埂六壩上流若在下流如何堵禦康熙七年九年二十二年七里溝清水潭龍窩等處衝決之時其水甚大去年水不甚大然而衝決者皆張鵬翮自以爲河工已竣玩忽之所致也○己未以金世榮爲兵部尙書由福建浙江總督遷○庚申以李旭升爲左副都御史由太常寺卿遷○丙寅以梁世勳爲廣西巡撫高啟桂爲山東布政使蔣陳錫爲河南按察使由直隸天津道遷○以張伯行爲江蘇按察使由山東濟甯道遷○庚午以宋大業爲內閣學士由詹事遷○壬申原任容美土司田舜年奏臣暮年始生子田昞如愛惜太過不知其惡是以奏請承襲土司而田昞如襲職後惡迹盡露臣乃

摘田昞如土司之印拘禁之一面申詳督撫一面奏參革職後奉

聖旨准田宜男承襲有臣讎家桑植宣慰司宣慰使向長庚誘田昞如逃往伊處又揚言送往容美爲土司恐嚇臣屬下人其子又年幼不能鎮定人心猜疑屬下土司軍民俱恐田昞如報讎紛紛告請將臣第三子田曜如爲土司臣赴省見總督申說情由總督卽以臣爲與向長庚互訐違誤欽案交司道官將臣看守祈

皇上俯憐准以土司之職使臣第三子田曜如承襲審究向長庚藏匿要犯之情以肅法紀得旨此事作速發往問趙申喬俞益謨○甲戌諭大學士等閩省海疆與臺灣相近總督職任必得才兼文武之人乃可原任總督金世榮爲人忠厚居官雖無惡處然無才不能治事去年福建小有旱災金世榮並未舉奏其奏改海中商舶式樣雖奉准行亦不能改廣東之賊沿海直至山東金世榮

恬然不知殊有忝總督之任矣順治十六年海賊犯江甯宜永貴守瓜洲後鎮江已陷而宜永貴堅守瓜洲終能保全大都地方官平時無不自矜及至有事茫然無知苟且塞責者多前福建提督塞白禮尙似可用之人及耿精忠叛彼畏懼託病不出封疆大臣可以如是舉動乎○諭戶部朕宵旰圖維勤求民隱每欲敷蠲貸之恩以爲閭閻留有餘之力直隸山東地方康熙四十二年偶遇災沴因特免山東康熙四十三年四十四年額賦並康熙四十一年以前積欠錢糧直隸則順天河間兩府康熙四十四年額賦亦俱行豁免今雖屢年收穫民氣漸舒而所有宿逋尙應輸納朕念黎元方有起色辦賦猶艱若一時新舊並徵勢難兼應宜更加寬恤以宏休養直隸自康熙四十一年至四十四年各府屬未完民欠銀八萬二千七百兩有奇糧五千九百石有奇山東省康熙四

十二年各府屬未完民欠銀一百六十九萬一千七百兩有奇糧
五千九百石有奇或見在徵收或分年帶徵俱著通行蠲免俾小
民悉除逋負之累儻應徵舊欠有見完納在官者即准抵本年正
賦諭旨到日各該撫速行所屬有司徧示曉諭有不肖官吏蒙混
徵收不與開除明白者該撫即時參劾嚴加治罪○丁丑以梁鼎
爲福建浙江總督由福建陸路提督遷○戊寅 上巡幸塞外啟鑾○癸未
予故兵部尙書屠粹忠祭葬

六月丁亥朔諭修國史諸臣開國功臣作傳當因其事蹟先後以
定次第若視功績分次第或有本人功績少而子孫功績多者反
置子孫於前列可乎今應分別 太祖 太宗 世祖三朝功臣
以何人居首請旨再定至逮事 三朝功臣各於本人傳內通行
開載事蹟其子孫有立功者附載於下俟作傳畢可錄出分給其

子孫各一通令藏其家○辛卯諭大學士等工部侍郎穆和倫觀其爲人一無知識而又執拗褻條奏山東地方多烏槍火器宜行禁止並解入官復欲遷山東饑民於他省朕謂山東百姓撫養有素儻或有變朕即可傳檄而定烏槍等器收取何爲若遷饑民於他省則山東虛無人矣穆和倫語塞然尙以不納所言爲憾察其情狀竟似病狂之人昔給事中莫羅雅齊納並無緊要之事每託辭密摺欲獨行進奏朕以向來起居注官從不回避密奏之事因令近前侍立以聽所言自此伊等遂不奏一事此特欲外人不聞所言何事則此一日之升降官員皆以爲伊等舉劾之力耳此種人品行甚不堪問也○癸巳偏沅巡撫趙申喬湖廣提督俞益謨遵旨覆奏容美司土司田舜年不法各款請命大臣往審得旨著都察院左都御史梅鋐內閣學士二員前往察審○壬寅諭戶部

工部戶工二部凡咨取錢糧事俱不奏聞所以二三十萬銀兩不過以一咨文取之而事已畢嗣後著戶工二部將不啟奏用咨文動支大小款項錢糧於月終明白彙奏則凡事知所做畏而錢糧大可節省矣○戊申湖廣總督石文晟奏原任容美司土司田舜年來省臣令藩臬二司暫行拘留隨因中暑病故又查田舜年降逆賊吳三桂時以其印繳吳三桂及投誠後於康熙二十年鑄印頒給今驗其印乃康熙元年所鑄其中情弊難逃 聖鑒得旨此兩事俱發梅鋞等一併察審具奏○辛亥予故浙江巡撫張泰交祭葬○工部議覆四川巡撫能泰奏瀘河安樂地方建鐵索橋告成請移化林營沈村防守千總一員兵一百名鎮守 上諭大學士等往達賴喇嘛地方途中鐵索橋甚多是以安樂地方亦如彼處建鐵索橋然此處之橋與雲南鐵索橋不同雲南地方於兩石

嚴貫鐵索建橋極其堅固今安樂地方立石柱貫鐵索爲橋久之
恐未必堅固耳其移兵防守之處著照該撫所請行

東華錄

康熙三十八

臣王先謙敬編

臣周澐蕃恭校

秋七月丁巳諭大學士馬齊朕自親政以來斷不許人懷挾私讐互相陷害是以三四十年間無大臣互訐之事此一端朕心頗以爲善凡誣陷人及攻城屠戮人者縱使其身倖免於禍子孫斷乎不昌近觀貪官受報亦復如是從前督撫如屈盡美等皆以貪故其子孫極貧困不能自存或有學道考試不公而所生之子凡書讀過卽忘並有瘡啞者天道甚可畏也前次考試時朕有所素知之人與考朕恐使人知之則必取中故不以告人凡人功名所繫去取但欲其秉公耳朕尙以孤寒抱屈爲念試官何不一計及於此乎○戊午封下嫁翁牛特多羅杜楞郡王蒼津公主爲和碩溫

恪公主授蒼津爲和碩額駙○庚申 上駐蹕熱河○甲子禮部

奏信郡王董額薨逝請加卹典 上諭大學士等董額補授都統

襲封王爵以來並無感恩效力之處且原係軍政問罪之人不准

賜卹其王爵亦當論嫡長所生應以前信郡王鄂扎之子德昭襲

封○癸酉御史袁橋奏參山西巡撫噶禮居官貪婪各款得旨著

噶禮明白回奏○己卯諭大學士等侍郎穆和倫人不甚惡但其

性執拗耳朕聽政四十餘年何人不知何事不歷似此執拗之人

卽如是而止猶可儻有大事必至貽誤而伊身亦罹禍矣昔經畧

莫洛於事敏達騎射亦優人材壯健但偏執己見莫洛欲率伊所

招綠旗兵丁進剿其時王輔臣諫云召募之人不可信用莫洛言

我所用之人有負我者乎朕所遣納爾泰亦在彼力勸阻之莫洛

謂納爾泰童穉何知不聽與莫洛同行之員外郎薩哈連馳報至

京朕謂之曰汝速往諭經畧斷不可輕率兵前進進必有變莫洛
執意欲行至甯羌州地方王輔臣標下官兵鼓譟莫洛遂身被其
害于成龍亦妄帶人至河上自謂所帶之人斷不負彼而信用之
後皆貽誤故凡執拗輕信之人未有不誤厥事者也○庚辰 皇
子允禔生○壬午以黃明爲浙江布政使由江西按察使遷調劉蔭樞爲
雲南布政使由廣東調

八月壬辰督修上下兩河工程都統孫渣齊等奏臣等遵旨將高
家堰滾水壩高郵車邏中壩及文華寺澗河等工皆已分與京中
派出官員如式修理次第告竣業經會同督撫驗明交與河道總
督張鵬翮取具印領訖下所司知之○癸巳 上幸巴顏額爾追
翁牛特諸台吉及眾蒙古列跪道左奏言臣等翁牛特地方向來
謀生甚艱蒙 皇上遣官訓以謀生之道禁止盜賊加以養育又

賜牛羊使孳生蕃息臣等俱各得其所今公主下嫁多羅杜楞郡王蒼津又蒙 聖駕親臨光榮無比合詞迎 駕歡呼動地是日

上駐蹕和碩溫恪公主第○己亥先是提督山西學政鄒士璉因巡撫噶禮爲御史袁橋參劾代士民具奏保留至是御史蔡珍奏參鄒士璉身係學臣職在衡文若黜陟大吏權由 天子乃借

此代奏結交撫臣將來朋比營私勢必無所不至請敕部議處以

肅官方下部察議○轉殷特布爲兵部左侍郎以恩丕爲兵部右

侍郎

由內閣學士遷

○壬寅以傅澤淵爲江西按察使

由陝西糧道遷

○丙午吏

部奏廣東布政使劉蔭樞已畱補雲南布政使其見升雲南布政使高必宏應俟到部候缺另補至廣東布政使員缺見無合例之人 上命以高必宏補授廣東布政使○辛亥 上回鑾

九月戊辰賜來朝外藩衣幣及隨圍喀喇沁官兵人等銀布○庚

午先是山西巡撫噶禮因御史袁橋奏參遵旨回奏得旨該部察議具奏至是吏部議噶禮回奏疏內雖稱被參各款皆屬虛誣而御史袁橋參奏內稱各款俱有證據事之虛實難以懸議請差大臣察審 上諭大學士等此事或有私情奏參或據實奏參著九卿詹事科道會同秉公議奏○己卯 上還京師○癸未先是湖廣總督石文晟奏參容美司土司田舜年一案 上命左都御史梅鋐內閣學士二高往審至是梅鋐奏原任容美司土司田昞如酷虐事迹俱有證據應革職桑植宣慰土司向長庚抗匿田昞如應降四級畱任已故容美司土司田舜年出征苗子捏病規避各款俱有證據應追革田舜年職至田舜年私造宮殿淫亂各款俱無證據應毋庸議田昞如土司員缺應將田昞如子姪中擇一人承襲湖廣總督石文晟等奏稱田舜年所屬之人唐世甲等控訴

田舜年父子俱不善我等情願納糧當差應否將其土地人民入我版圖伏候 上裁學士二局奏案內有名容美土司二十餘人俱未赴審故未經質審之處甚多田舜年治病醫生及檢屍知縣洪國柱俱未到案田舜年身死尙未明白儻草率結案則土司之心不服奏入下九卿詹事科道會議具奏○甲申以安達禮爲甘肅布政使

由郎中遷

冬十月乙酉朔吏部尙書敦拜以老乞休 上諭大學士等敦拜由司官擢用至尙書並無效力勤勞之處凡事不畱心詳察聲名亦不佳且廷議係國家大事前有事會議敦拜不諳事理恣意妄言彼時卽當黜退今旣以年老乞休著解吏部尙書任凡爲人臣者雖當暮年宜更加意潔己勤勞王事如謂年老畱不畱心諸務黽勉自效豈任彼爲大臣徒使之榮顯已耶尙書溫達自任工部

以來聲名甚優凡事敬慎而寬厚著調補吏部尙書○己丑以希

福納爲工部尙書

由左都御史遷

○庚寅諭武殿試讀卷官等今天下太

平日久曾經戰陣大臣已少知海上用兵之法者益稀日久臺灣不無可慮朕甲子年南巡由江甯登舟而下至黃天蕩江風大作眾皆危懼朕獨令衝風而行朕佇立船頭射江豚畧不經意後又南巡乘船渡江微覺心動去歲之行見人渡江者卽爲心悸由此觀之皆年爲之也大約年少則血氣強年老則血氣衰嘗問之宿將皆云年力少壯故能登城陷險今則怯矣凡將軍提督總兵官當年少時冒鋒鏑越險阻所在效力及位至大僚家亦富饒而年齒漸高設一旦有事使之率兵而行欲其奮勇效命如前何可得耶又諭凡人必耐得勞苦乃能有成不耐勞苦到處無用不但武臣爲然卽文臣若不勞苦學問如何成就今爾等二三老臣年雖

高而勤勞實甚觀部院官止圖安逸凡事俱不經心兵部前以會試人未到齊請展限數日此彼所親奏之事也昨問續到幾人堂官俱不知因令問司官筆帖式亦皆不知朕之使問司官筆帖式者原欲伊等知愧不知伊等亦知之否至於會議時九卿內但二人立議餘皆隨班畫奏竟無一留心任事之人矣○辛卯賜楊謙等九十四人武進士及第出身有差○丁酉諭大學士等九卿議土司事但欲使兩造平息總督石文晟原參田舜年建造宮殿行兇作惡是以羈留於武昌府今田舜年已故石文晟又具奏欲息其事如土司等果抗拒不法則當發兵征勦土司等若無罪則當反坐原參之人朕意以二高所奏爲是此事不便令督撫提督會同審理當再特遣大臣前往察審著以此諭九卿○戊戌以耿額爲左都御史

由副都統遷

○己亥命歲選杭州江甯江安駐防官員

驍騎校等善騎射者每旗二人從熱河行圍駕還遣回汛○庚子
刑部侍郎魯瑚緣事降調○辛丑詔河工奏水汛毋過三日○壬
寅命大學士席哈納侍郎張廷樞蕭永藻往湖廣察審容美土司
田舜年案○乙巳諭戶部國家錢糧理當節省否則必致經費不
敷每年有正項蠲免有河工費用必能大加節省方有裨益前光
祿寺一年用銀一百萬兩今止用十萬兩工部一年用銀二百萬
兩今止用二三十萬兩必如此然後可謂之節省也○諭大學士
等前遣護軍統領席柱等往擒假達賴喇嘛及第巴妻子時諸皇
子及諸大臣俱言一假達賴喇嘛擒之何爲朕意以眾蒙古俱傾
心皈嚮達賴喇嘛此雖係假達賴喇嘛而有達賴喇嘛之名眾蒙
古皆服之儻不以朝命遣人往擒若爲策妄阿喇布坦迎去則西
域蒙古皆向策妄阿喇布坦矣故特遣席柱等前去席柱等方到

其地策妄阿喇布坦果令人來迎以此觀之若非遣人前往則假
達賴喇嘛必已歸策妄阿喇布坦矣至西域回子及蒙古今衰弱
已極欲取之亦甚易但并其地不足以耕種得其人不足以驅使
且見今伊等已俱恪守法度是以不取此等情事漢大學士及九
卿等想俱未深悉爾等可將朕諭示之○丙午諭大學士等昔日
達賴喇嘛存日六十年來塞外不生一事俱各安靜卽此可知其
素行之不凡矣後達賴喇嘛身故第巴雖隱諱不言然觀其啟奏
之辭非昔日達賴喇嘛語氣朕是以知其已故遣使細訪乃盡得
欺詐之狀自達賴喇嘛故後第巴遂敎噶爾丹各處妄行生事矣
○以魏齊爲刑部左侍郎由光祿寺卿遷○丁未諭大學士等觀朝鮮國
王凡事極其敬慎其國人亦皆感戴聞其國有八道北道與瓦爾
喀地方土門江接界東道接倭子國西道接我鳳凰城南道接海

猶有數小島此等地方 太宗文皇帝定朝鮮之役我兵無處不到以已破之國我朝爲之重加營建俾安堵如故是以其國人於

太宗文皇帝駐軍之地樹立石碑備書更生之德累世感戴以至於今且彼更有可取者明之末年彼始終未嘗叛之猶爲重禮義之邦也又諭翻譯之事大有關係向年纂修 實錄所譯朝鮮

度文滿漢文意不相符前大學士圖海杜立德呈朕親覽朕兩年

苦心尋繹始得文義完美作史之事殊爲重大一字不可輕易增

減也○己酉諭戶部朕子育黎元日求所以休養利濟之道念惟

賜租減賦實有裨益於民生直隸各省錢糧次第全蠲一年者業

經數舉獨是歷歲逋負積累加增舊稅新徵勢難兼辦縱使稍寬

民力分年帶輸而督令續完仍多拮据朕睠懷及此深切軫恤用

是大沛恩膏俾閭閻獲免追呼官吏亦不罹參罰直隸山東積欠

錢糧今年俱已蠲免其山西陝西甘肅江蘇安徽浙江江西湖北湖南福建廣東各省自康熙四十三年以前未完地丁銀二百一十二萬二千七百兩有奇糧十萬五千七百石有奇著按數通行豁免或舊欠已完在官而見年錢糧未完足者亦准扣抵諭旨到日各該撫立行所屬張示徧諭如有不肖有司以完作欠蒙混銷算及開除不清者該督撫卽時奏參嚴加治罪○辛亥諭大學士等山東長山縣周村一帶俱開鑪私鑄巡撫趙世顯不禁不捕乃奏請鼓鑄大錢若不禁私錢而鑄大錢則大錢重小錢輕小民必思射利毀大錢而鑄小錢是大不利於地方矣今山東奸民鑄小錢者甚多或地方官圖利與之同事亦未可知但未拏獲何可懸擬頃差侍郎恩丕等帶德州兵丁馳驛往長山縣周村等處捕鑄私錢之人已諭伊等於拏獲之後並私鑄之鑪帶往趙世顯處示

之問以地方見鑄私錢不禁不捕又欲請鑄大錢何故觀趙世顯更將何辭以對外省督撫孰賢孰否朕俱知之清濁斷不能掩也○以伍實爲甘肅布政使由郎中遷○王子諭大學士等刑部之事重大常綬自任刑部侍郎以來錯審之事甚多著調常綬爲工部侍郎以工部侍郎巢可托爲刑部侍郎○是月免江南海州淮安等十六州縣衛水災額賦有差

十一月己未予故盛京工部侍郎白爾克祭葬○壬戌諭大學士等噶爾丹遇我軍於克魯倫之地未嘗交戰乃往西路遇西師進擊盡被殺戮西路兵獲其牛羊二十餘萬甚爲得濟此乃天意也昔吳三桂兵圍永興城危在旦夕矣吳三桂一死其兵皆退此亦天意也長沙之戰吳三桂登城語其下曰滿兵向皆勇猛今衰弱矣言未畢我前鋒統領碩岱率諸前鋒軍奄薄城下吳三桂驚歎

曰滿兵仍前驍勇耶自明代以來福建皆受海寇之患今已盡降矣其中有劉國軒者已授爲總兵官朕問彼滿兵如何彼奏云臣乃當誅之人蒙皇上寬恩不殺何敢誑言從前與滿兵交戰七十餘次雖爲滿兵所敗臣猶不心服意謂滿兵但恃力耳及詳視之既有謀畧更兼勇猛於是臣始心服矣以此觀之滿兵誠強而無敵也又諭往代之君不接見諸臣臣下之意無由上達政何以得理耶○癸亥以慕成額爲盛京刑部侍郎

由左副都御史遷

○丁卯大學

士等以秋審情實罪犯七十人請旨 上將招冊逐一詳閱反復審定句決者二十五人諭大學士等四輔臣時每年句決動至百餘人朕親政後數十年來每遇句決凡有一綫可原者未嘗不從寬宥直至萬無可疑始予句決至於光棍及有關主僕之分者其罪斷不可寬也○戊辰大學士等奏九卿等議山東巡撫趙世顯

奏濟南臨清所屬開鑪鼓鑄一事奉旨俟差往山東緝拏私鑄大臣回日再奏今侍郎恩丕等已回謹以原案請旨 上曰數年以來私鑄甚多制錢甚賤屢諭九卿確議著該管官員嚴行緝拏乃山東奸民私鑄者愈多眾皆知之無一人舉奏參劾趙世顯身爲地方大臣既不嚴拏反請暫停錢禁以便小民又奏請於濟南臨清地方開鑪鼓鑄九卿議照巡撫所奏以鼓鑄之事交知府管理朕訪察山東奸民私鑄巢穴確有所見差大臣緝拏俱已擒獲不知九卿附和趙世顯者何意著明白回奏○以張格爲左副都御史

由通政使遷

○己巳諭大學士等因山東私鑄小錢故特差侍郎恩

丕等緝拏今既禁私鑄又不收取則用私錢者無日可止矣朕意欲令來年徵收山東錢糧其銀一兩折錢二千俟錢盡時照二千錢之數折收諸樣銅器則不出一年私錢自盡矣彼地官員不能

緝拏私鑄俱係有罪之人卽將所收錢及銅交付伊等運至京城以贖前罪運到之時卽著增鑪作速鼓鑄制錢爾等可與九卿詹事科道會同詳覈議奏○禮部等衙門遵旨會議王以下公以上之女受聘後俱受封爲郡主鄉君等品級不便令額駙帶往外任嗣後額駙等停止補放外任官如見今居外任官者撤回京城照伊品級補用如係特旨補授封疆大臣者其妻應否帶往任所令伊等自行具奏請旨從之○癸酉九卿等遵旨回奏山東奸民私鑄 皇上特差侍郎恩丕等拏獲以其人交趙世顯取到私錢與臣等觀之臣等始知山東私錢若是之多應將趙世顯所請開鑪鼓鑄之處無庸議至臣等愚昧前旣不能察明會議又不加詳細罪亦何辭今遵旨將山東來年錢糧折收小錢銅器會議摺子呈覽 上曰著遣賢能司官一員卽齎此摺往問趙世顯果否有意

於地方著具奏○戶部工部以開浚清河至通州開列督工官員
請旨 上命尙書金世榮侍郎巴錫范承烈督工諭大學士等侍
郎巴錫不諳部務著解侍郎任隨旗行走仍令往監河工○諭戶
部朕念八旗禁旅爲國家根本所繫時加恩愛養用俾生計充盈
或動支公帑數百萬代清積逋或設立官庫資濟匱絀所以爲眾
甲兵籌畫者甚切康熙四十二年又曾頒發帑金貸給八旗兵丁
共六百五十五萬兩有奇至康熙四十五年冬除陸續扣完外尙
未完銀三百九十五萬六千六百兩有奇若仍行按月扣取恐各
兵營辦器用贍養室家必有不敷之慮朕每懷及此深切軫惻茲
特大沛恩施式宏撫育將未經扣取銀兩通行豁免爾部卽傳八
旗都統等出示徧諭俾咸知朕優恤禁旅至意○甲戌 上謁
陵啟鑒○漢水溢免南鄭等縣賦命所司賑之並緩明年以後徵

○安布祿以老病乞休允之以阿山爲刑部尙書

由江南江西總督遷

○工

部議覆河道總督張鵬翮奏仰遵 上諭開鮑家營引河黃河異

漲之水藉此減洩再於中河橫隄建草壩二座於開鮑家營引河

之處建草壩一座相機啟閉從之○庚辰 上謁 暫安奉殿

孝陵至 仁孝皇后 孝昭皇后 孝懿皇后陵奠酒○辛巳以

邵穆布爲江南江西總督

由禮部左侍郎遷

○癸未山東巡撫趙世顯遵

旨回奏徵收小錢銅器有利於民且可以禁止私錢得旨著照九

卿前議行○甲申 上巡幸塞外○是月免江南徐州水災額賦

有差

十二月丁亥先是達賴喇嘛身故第巴匿其事構使喀爾喀厄魯

特互相仇殺擾害生靈又立假達賴喇嘛以惑眾人且曾毒拉藏

因其未死後復逐之是以拉藏蓄憾興兵執第巴而殺之陳奏假

達賴喇嘛情由 上命護軍統領席柱學士舒蘭爲使往封拉藏

爲翼法恭順汗令拘假達賴喇嘛赴京拉藏以爲執送假達賴喇

嘛則眾喇嘛必至離散不從席柱等奏聞 上諭諸大臣曰拉藏

今雖不從後必自執之來獻至是駐紮西甯喇嘛商南多爾濟果

報拉藏起解假達賴喇嘛赴京一如 聖算眾皆驚異○轉鐵圖

爲禮部左侍郎以赫壽爲禮部右侍郎由內閣學士遷○以莫音代爲工

部右侍郎由通政使遷○辛卯封下嫁喀爾喀台吉策凌之公主爲和

碩純愍公主授策凌爲和碩額駙○壬寅 上還京師○甲辰刑

部會同吏部等衙門覆奏侍郎常綬等審奏廣東海寇一案一議

海寇蔡三十二等攔截泛海商船劫奪銀米俱應立斬總督郭世

隆不將實情審出應降三級調用原任巡撫今升湖廣總督石文

晟提督趙宏燦未經詳審列名具奏俱罰俸一年承審按察使今

升河南布政使許嗣興等分別降級調用又一議總督郭世隆不豫先嚴禁強暴之人及蔡三十二等事發又朦朧掩飾草率具奏殊爲溺職應革職餘如前議得旨蔡三十二曾贊伯黃士文賴亞客陳阿七俱立斬許嗣興著降一級調用郭世隆著革職餘依議○乙巳調凱音布爲禮部尙書由戶部調以蘇克濟爲陝西布政使由內閣侍讀學士遷○詔刑部罪囚緩決至三四年者減死一等直省亦如之○內閣九卿等奏請 聖駕閱視溜淮套工程得旨朕年已漸增憚於臨幸且南方水土不比北地每渡大江河海及過閘口亦甚加廬念不欲親往閱視著將興工之處再行定議具奏○庚戌理藩院奏駐紮西甯喇嘛商南多爾濟報稱拉藏送來假達賴喇嘛行至西甯口外病故假達賴喇嘛行事悖亂今旣在途病故應行文商南多爾濟將其屍骸拋棄從之○辛亥內閣九卿等會議溜

淮套一工據升任江南江西總督阿山等及督修都統孫渣齊等各奏必得 皇上親歷河干面授方畧則億萬年奠定之功可以立成臣等所見亦與伊等相同伏冀俯允所請東南臣民不勝慶幸得旨內閣九卿等僉謂溜淮套工程非朕親臨指示不能斟酌盡善再三陳請朕以此奏聞 皇太后奉 皇太后懿旨事關重大故諸大臣合詞懇請予身體甚健皇帝躬臨指授於地方民生甚有裨益朕祇遵 懿旨親往閱視著該衙門擇日具奏○以趙宏燦爲廣東廣西總督由廣東提督遷○是月免直隸武清江南潁州等四州縣衛水災額賦有差○是歲朝鮮來貢○人丁戶口二千四十一萬二千五百六十田地山蕩畦地五百九十八萬八千九百五十頃五十三畝有奇徵銀二千七百四十一萬六百八十八兩有奇米豆麥六百九十七萬一千三百五十三石有奇草二百八

萬一千六百八十七束茶十五萬七千四百十五引行鹽四百三十三萬九千四百九十五引徵課銀二百六十九萬七百二十八兩有奇鑄錢二萬三千八百七萬五千八百有奇

東華錄

康熙七十九

臣王先謙敬編

臣周淪蕃恭校

康熙四十六年丁亥春正月丁卯諭吏部戶部工部兵部朕念淮黃兩河工程爲東南要務屢次躬臨河上相度指示一切修防疏濬業已次第奏功昨歲河漕督撫諸臣詳勘地形請於濶淮套別開河道直達張福口以分淮勢朕欲卽令動帑興築而督撫諸臣又以事關勦建合詞請朕親閱九卿等計議復再三陳請朕以諸臣之言奏聞 皇太后祇遵 慈命擇於本年正月二十二日啟行閱河舟楫往返不御室廬日用所需取辦內府經過府州縣毋得更以豫備行宮供設御用侵冒庫帑科歛閭閻儻有不遵事覺定嚴加治罪其文武大小官員私相餽贈隨從人役生事擾民及

奸惡挾私告訐者俱如屢次諭旨重處不宥爾等卽轉行各該督

撫通飭所屬張示徧諭俾咸知悉○庚午調希福納爲戶部尙書

以赫碩咨爲工部尙書

由戶部右侍郎遷

○乙亥革左都御史梅錫職以

審湖廣土司田舜年一案回奏不實也○丙子 上南巡啟鑾○

辛巳以蕭永藻爲左都御史

由兵部右侍郎遷

赫申爲戶部右侍郎

由左副都

御史

○予故工部尙書熊一瀟祭葬

二月己丑調范承烈爲兵部左侍郎管右侍郎事轉汪晉徵爲戶

部左侍郎以許汝霖爲戶部右侍郎

原任禮部左侍郎

○以牛祐納爲左

副都御史

由通政使遷

○乙未諭大學士馬齊等山東巡撫趙世顯向

以條奏小錢一事革職畱任朕此行見其勤慎效力著削去加二

級復還原品○增廣西義甯永甯等二十三州縣及思明土府學

官○准河南布政使許嗣興降級畱任從巡撫汪灝請也○戊戌

御舟次江南境臺莊士民數十萬人進獻食物跪請 聖主暫

停龍舸少伸瞻仰微忱 上爲之登岸御龍亭命耆老近前諭令

停止進獻耆老等復再四叩懇收納命受食物一二種又問以農

事生計良久登舟啟行○壬寅 上次清河閱武家墩○癸卯

上閱視漕淮套由清口登陸詳看地方形勢駐蹕曹家廟 上御

行宮門外命扈從文武臣工及地方大小官員河道總督及河工

官員等列跪於前 上問張鵬翮曰爾何所見奏開漕淮套張鵬

翮奏曰我 皇上愛民如子不惜百萬帑金拯救羣生黎民皆頌

聖恩 上曰爾所言皆無用閒文朕所問者乃河工事務文章

與政事不同若作文字牽引故典便可敷衍成篇若論政事必實

在可行然後可言非虛文所能飾也凡事在大廷廣眾可言者方

是至公無私今滿漢文武內外大小諸臣齊集爾可將此河當開

與否一一明奏何必牽引閒文張鵬翮奏曰先因降調通判徐光啟呈開濶淮套圖樣臣與阿山桑額會同具奏奉旨命臣等閱看臣等因事關重大所以再四懇請 皇上躬臨閱視指授定奪

上曰今日沿途閱看見所立標竿錯雜問爾時全然不知問河官亦皆不知河工係爾專責此事不留心何事方留心乎張鵬翮不能對免冠叩首 上問劉光美于準曰爾等何以亦奏此河應開劉光美等奏曰肝胎清口係臣等所屬地方故會同查勘至於應開河與否總河久在河工尙不能知臣等愚昧何以深悉但開河係臣等公同具奏冒昧之罪更有何辭亦免冠叩首 上又問張鵬翮曰水平是何人看驗張鵬翮奏云見任清河縣主簿方德宏同大計參革主簿郭維藩降調通判張調鼎徐光啟看驗 上問曰土方是何人料估張鵬翮奏云徐光啟料估 上曰徐光啟等

皆大計參處至不堪小人惟知亡命射利不得齒於人列此等重
大事情爾竟委任伊等是誠何心因顧諸臣曰前阿山等察勘泗
州水勢奏稱溜淮套地方另開一河出張福口可以分洩淮水免
洪澤湖之異漲保高家堰之危險繪圖進呈請朕親閱在廷諸臣
亦以河工事關重大再四懇請朕始親行昨日閱武家墩朕尙謂
果如阿山等所奏溜淮套可以開成今日乘騎從清口至曹家廟
地方詳看見地勢甚高雖開鑿成河亦不能直達清口與伊等進
呈圖樣迥乎不同且所立標竿開河不獨壞民田廬甚至毀民墳
冢朕惟恐一夫不獲其所時存己飢己溺之心何忍發此無數枯
骨朕爲人君凡頒發諭旨儻有差誤尙令人言張鵬翮身爲總河
至欲掘人骸骨所屬人員竟無一敢言者張鵬翮以讀書人而爲
此殘忍之事讀書何爲假令張鵬翮祖墳被人發掘伊肯默然耶

數年兩河平靜民生安樂何必多此一事先年靳輔所開中河凡漕運商民船隻避黃河一百八十里之險此河確有成效至今往來之人尙追念之但靳輔所開止因舊河身疏濬今欲開溜淮套必至鑿山穿嶺不惟斷難成功卽或成功將來洪水泛溢不漫入洪澤湖必致衝決運河矣 上又問張鵬翮及眾河官曰此河若開爾等能保無事乎張鵬翮等奏云臣等一無所知數年來皆仰賴 皇上教訓指授此工如何敢保 上曰今奏溜淮套開河非地方官希圖射利卽河工官員妄冀升遷至河工效力人員無一方正者何故畱置河上張鵬翮奏云臣誤用小人罪有何辨 上諭大學士馬齊等曰朕看南旺湖水分南分北實有大功用意迴異常人朕每次臨閱深嘉其才馬齊奏云挑水壩人字河芒稻河鮑家營諸工皆係 皇上指示超出南旺分水之上 上曰南旺

分水自高山引出事屬勘舉今所開之河皆由舊河形疏濬與勘
舉者不同大學士張玉書奏云引汶水分南北流是當日老人白
英所建之議其策原善今 皇上睿裁築御壩開引河俾淮水敵
黃黃水趨海此萬世之永利亦萬世之良法也 上曰明代黃水
勢強淮水勢弱故有倒灌之患朕自甲子年南巡閱視兩河形勢
記憶甚詳漸次修治今則淮強黃弱矣然善後之策尤宜亟講與
其開濬淮套無益之河不若將洪澤湖出水之處再行挑濬令其
寬深使清水愈加暢流至蔣家壩天然壩一帶舊有河形宜更加
挑濬使通運料小河俾商民船隻皆可通行卽漕船亦可輓運爲
利不淺矣諭畢 上還行宮少頃命一等侍衛馬武等傳諭河道
總督張鵬翮曰河工效力人員內稍有可觀者猶可容留河上如
同知南夢班降調通判徐光啟主簿方德宏俱屬不堪匪人著斥

革逐去又召大學士馬齊諭曰濶淮套開河必至毀民田廬墳冢且地形甚高雖開鑿成河亦不能直達清口朕將此等情由在扈從諸臣地方大小官員前窮問總河巡撫河官伊等皆不能對惟叩首認罪而已此河斷不可開卽繕寫諭旨傳諭在京諸臣前任總督阿山何所見亦奏此河當開著問阿山回奏○刑部議准雲南貴州總督貝和諾奏原任雲南巡撫佟毓秀糾參布政使佟國勳暗勒火耗扣剋兵餉各款察審俱虛請復佟國勳所革之職從之○甲辰 上自曹家廟還清口將沿途所立開河標竿盡行撤去百姓見之踴躍歡欣咸曰 聖上深仁厚德不惟生者霑恩亦且下及枯骨我等無以報答惟仰祝 聖壽無疆而已 上自清口登舟諭大學士馬齊等曰凡天下事行之有益者自宜亟行如無益斷不可輕舉譬如人之一身有病方可用藥餌鍼砭如無病

之人或告以割肉可得延年斷無聽從之理開河事亦類此今欲於濶淮套開河是平靜無事之時多此一事不惟無益而反有害矣又諭曰朕觀此地百姓可謂淳樸彼見豎立標竿墳墓之上毫無怨色朕沿途訪問仍云皇上聖仁愛恤百姓不辭勞苦躬臨閱河特爲小民起見我等何敢妄置一詞及聞朕諭濶淮套停止開河羣情歡悅不勝鼓舞感激可見伊等惟知尊上絕無他意可謂良民矣是日大江以南百姓各舉旗幟恭迎 聖駕叩請臨幸江南 上允所請百姓歡聲雷動○乙巳 上召扈從大小臣工及總督巡撫司道總河河官近 御舟前列跪於岸 上諭張鵬翮曰爾身任總河宜時時巡視河隄不避風雨以勉盡職守乃安居署中兩三月不一出惟以虛文爲事何事不致耽誤若論文字朕亦嘗爲之爾所作文字亦未必佳爾口中常稱朱子朱子之書朕

不時披覽見置朕側爾能記憶一條乎宋儒所言光風霽月爾能
稍似否爾惟任用一二不肖漢官偏聽其言河工事務漫不經心
朕嘗謂天地風雷有不測之變異不可恃隄岸之堅須竭盡人力
曲爲綢繆曾經再三訓諭後洪澤湖水漲溢隄岸危險河官欲開
浚水壩前土壩以洩水勢屢次申報爾置若罔聞以致古溝一帶
地方咸被衝決爾行事刻薄不以禮待屬員口無忌憚使眾人皆
畏懼爾朕雖加訓諭並不悛改且語多欺誑康熙四十四年朕南
巡閱河問爾高家堰石工何時可以修竣爾奏云本年七月內工
竣乃遲延至逾年不完今又以溜淮套地方可以開河請朕親臨
更屬欺誑朕之言無不可向眾人言之者今大小臣工齊集於此
爾有何說可於眾人前直陳張鵬翮免冠謝罪上又諭曰加築
高家堰隄岸閉塞減水六壩使淮水盡出清口非爾之功修治挑

水壩偏黃水流向北岸非爾之功堵塞仲莊閘改建楊家閘令黃水不至倒灌清口非爾之功此數大工程皆與爾無涉更有何勤勞張鵬翮奏云臣實愚昧無知不能仰體 皇上訓旨夙夜恐懼

上曰爾不巡視河工惟夙夜恐懼徒自苦耳於河工何益與其夙夜空懷恐懼何如盡此力於河工張鵬翮奏云臣罪戾實多惟仰懇 皇上寬宥保全 上曰賞罰者國家大權內而九卿外而督撫原爲盡心於惠養斯民而設非徒使之榮顯宴安而已大吏廉潔則小吏自然效法苟不能勤慎致誤公事豈可因保全一人而廢國法乎凡事有可以保全者亦有當用剛斷者國家臣工甚多姑息一二人何以服眾又諭諸臣曰比年以來幸而水不甚大當年靳輔于成龍在任時水勢甚大若張鵬翮當此河工必致不堪張鵬翮惟有一長于成龍每不遵朕指示自立意見張鵬翮則

不然朕前以河務一一指授皆能遵行所以年來河工漸次底績歸仁隄原爲洪武祖陵建築靳輔以爲無用廢去殊屬不合清水使之入黃則黃水未有不被刷者使靈芝湖等水由祥符閘入黃殊覺有益但水勢泛溢由歸仁隄三閘流入洪澤湖水勢旣不能入黃雖開祥符閘亦覺無益若閉歸仁隄三閘以蓄水又恐水漲致淹上游民田亦非可行之事前靳輔慮高家堰隄岸危險開唐埂六壩以致洪澤湖水偏向六壩而流此靳輔誤處後黃河倒灌清口朕令閉塞六壩始能敵黃朕自甲子年至今六次南巡詳觀河形一年異於一年治河之道當看何處關係緊要便保守何處不可執一自古治河皆順水性爲今之計但當商酌使淮水稍洩其流乘水未長時豫爲綢繆將來水大長必不至於危險天然壩一帶舊有河形當挑濬此河酌量可容糧艘建立閘座水小則閉

開蓄湖水以敵黃水大則開閘使之暢流一面由武家墩通至運河一面通至高郵湖則商民船隻皆得長行似爲永久利益著張鵬翮率領在河能員確看定議具奏○丙午諭江南江西總督邵穆布安徽巡撫劉光美江蘇巡撫于準等前總督阿山總河張鵬翮總漕桑額等奏稱溜淮套地方開河朕循行周覽斷不可開今溜淮套工已降旨停止其湖水泛溢宜籌宣洩之道故諭張鵬翮親率能員於高家堰蔣家壩相度舊有河形之處建閘蓄洩以期永利爾等可卽張示徧諭各州縣人等咸悉朕慎重河務周恤民隱之至意○戊申杭州將軍宗室諾羅布等奏杭州兵民囑望聖駕臨幸伏祈俯賜俞允 上諭朕已允江南百姓懇請渡江巡省浙江當一體臨幸○庚戌河道總督張鵬翮以誤奏開溜淮套河具奏請罪得旨黃淮兩河關係邇道民生總河身任河務必勿

憚煩勞時親勘閱將應修應築之處斟酌合宜又能任用得人斯爲稱職張鵬翮聽信小人徐光啟議開溜淮套河竟不能親加審勘輒奏稱此河開濬有益所立開河標竿至毀壞民間墳冢田廬又地勢甚高雖開濬成河亦不能水出清口徒滋生事擾民張鵬翮輕舉妄動大負職掌九卿詹事科道將張鵬翮並前會奏請開溜淮套督撫等俱嚴加議處具奏○辛亥兵部等衙門議奏大學士席哈納等察審土司田舜年一案奏稱原參田舜年僭越淫縱等款俱虛應毋庸議其假捏幼孫年歲造冊報部希圖承襲又私將伊子田毗如冒原石梁土司田焜之名襲爲土司及鑄錢擅殺等款俱實應治罪但已經身故亦毋庸議至向久忠等捏詞控告應枷責僉妻安插內地革職宣慰司土司向長庚隱匿田焜如不解聽審應降四級畱任總督石文晟不行詳察草率具奏應降三

級調用巡撫劉殿衡趙申喬提督俞益謨將奉旨承審事件不行
詳查具奏各降一級罰俸一年俱應如所奏其承襲容美司土司
之職應將田舜年之子田旼如田曜如田暢如田睽如等開列伏
候 上裁得旨石文晟著降三級從寬留任容美司土司著田旼
如承襲餘依議

三月己未 上駐蹕江甯○庚申遣馬齊祭明太祖陵○辛酉閱
江甯官兵射○壬戌 上謁明太祖陵○己巳 上駐蹕蘇州○
丙子 上駐蹕松江○丁丑閱松江官兵射○戊寅 上召江蘇
按察使張伯行近前謂大臣曰朕至江南訪問張伯行居官甚清
此名最不易得張伯行由進士歷任按察使不可以書生待之張
鵬翮保舉人員內惟張伯行蔣陳錫尙優 上又命地方官俱近
前訓諭曰江南錢糧既多火耗雖輕斷無不足養廉者清乃居官

之常清官每多殘酷清而能寬斯爲盡善○諭吏部福建巡撫員缺甚爲緊要張伯行爲人篤實卽在行間亦非退縮者著升爲福建巡撫○己卯以馬逸姿爲江蘇按察使

由蘇松糧道遷

夏四月甲申 上駐蹕杭州○丁亥閱杭州官兵射○癸巳諭福

建浙江總督梁鼎等朕頃因視河駐蹕淮上江浙兩省官員及地方紳士軍民皆環道遠迎懇請臨幸朕勉順羣情涉江而南所至郡縣見雨暘應時麥苗蕃殖比閭樂業可冀盈甯方今二麥並熟正將刈穫之時誠恐百姓沿途迎送老穉扶攜動盈千萬越阡度陌不無踐傷朕心甚爲軫惜凡所過地方悉令停止迎送且節候漸熱朕舟行乘夜迎涼亦未可定民雖遠來無由親見爾等督撫可張示徧加曉諭無負朕重農愛民之意○甲午 上自杭州回鑾○以王家棟爲廣西按察使

由雲南永昌道遷

○戊申以卞永式爲四

川布政使

由廣西按察使遷

○庚戌諭大學士馬齊等甘肅提督員缺甚

爲緊要吳法爲總兵官副都統時聲名俱佳今任提督患病是實觀西甯總兵官殷泰材健人優從軍十餘次身經二十餘戰被創數處口齒爲鳥槍中傷馬步箭俱精而漢文亦通自任總兵官以來邊外蒙古內地人民無不稱頌且久居西土地方事情亦皆諳練著升爲甘肅提督又諭朕召福建提督吳英入語良久見其爲人篤實深得大體而心中明達朕語及海寇吳英奏云海寇斷不至延蔓苟至延蔓則任臣等何用然亦不能使不爲小寇也海中與城郭不同城郭有里甲易查寇盜無所棲止海乃汪洋之水賊乘一小舟到處藏匿難以緝獲然而爲賊者大都皆係商販本利虧折不得已而爲之者多此卽可謂之海寇乎所奏之言深中窾要且效力年久著加授將軍銜又提督中王世臣岳昇龍潘育龍

爲人俱優惜皆年老矣

五月壬子朔 御舟泊山陽縣諭河道總督張鵬翮及河官等古
今治河形勢不同舊時常患清水不足敵黃水每有黃水倒灌之
虞今清水敵黃水有餘運河清水甚大反流入高郵湖設高郵湖
水長溢入運河則運河東隄受險少有疏虞雖堵塞不難而生民
田廬不可問矣應加謹防護以保無虞清口湖水七分敵黃三分
濟運今應將大墩分水處西岸草壩再加寬大使清水多出黃河
一分少入運河一分則運河東隄不至受險又於蔣家壩開河建
閘引水由人字河芒稻河下江由下河及廟灣等處入海不惟洪
澤湖之水可以宣洩而盱眙泗州積水田地亦漸次涸出水小則
下板蓄水敵黃水大則啟板洩水且便於商民舟楫往來其祥符
閘口門甚窄趁此黃水不甚高之時委幹員將歸仁安仁利仁三

聞改寬洩水則徐州一帶民田可無淹沒之虞矣○河道總督張鵬翮奏臣遵旨親率河員於高家堰武家墩天然壩等處一一踏勘天然壩迤南清水溝及蔣家壩等處舊有河形俱應挑濬並於南北兩岸修築隄工建石閘一座草壩一座共需銀七萬六千兩有奇得旨見今溜淮套地方停止開河其武家墩天然壩等處工程著交與尙書徐潮侍郎鐵圖將原派帶來官員內揀選二十五員存畱修河並將所帶帑銀分工修理餘員俱著回京○癸酉

上還京師○丙子九卿等議張鵬翮阿山將溜淮套地勢並不確視以不可開濬者奏請開濬殊爲溺職應將張鵬翮革職阿山革任桑額劉光美于準並不詳確定議各降五級調用上諭大學士等聞驗視溜淮套之時張鵬翮桑額俱以爲不可開而阿山獨強以爲可開公同奏請著將阿山革任張鵬翮革去所加宮保桑

額降五級劉光美于準各降三級俱從寬畱任○先是湖廣總督石文晟以病乞休疏未批發至是諭大學士等石文晟人極粗鄙若爲土司而罷其職似未得體彼旣自行引病請休可令解任○諭滿大學士學士九卿等部院筆帖式當其初任筆帖式時卽應思黽勉以冀大用爾等皆從筆帖式升擢者也朕今見關差筆帖式多有從都統及護軍統領之筆帖式派出者問以事務茫然不知並其該管大人名姓亦不能記大約鑽營進身者多况 太祖皇帝 太宗皇帝之時都統護軍統領並未設筆帖式著將都統護軍統領之筆帖式盡行裁去候缺令都統取撥什庫披甲中知書者用之護軍統領取護軍中知書者用之令二三年一換又各衙門筆帖式亦皆裁去候缺其缺取護軍用之亦二三年一換此外再有應裁之筆帖式亦著裁去至中書內竟有年方童穉者此

皆徇情補用嗣後補授中書著引見○以李旭升爲工部右侍郎

由左副都御史遷

○丁丑宗人府奏參右宗人輔國公齊克塔哈伊祖阿

敏屢犯重罪

皇上宏恩將伊父瓦山優授公爵瓦山沒後將公

爵襲於齊克塔哈又補授右宗人應龍勉效力乃凡事推諉妄行

鑽營趨承諂媚應將齊克塔哈革去右宗人並公爵至閒散宗室

星尼係緣罪革去貝子繫禁家中之人 皇上寬恩赦出理宜悛

改守分今仍任意妄行鑽營應將星尼交伊族弟康親王椿泰嚴

加鎖禁從之○戊寅諭九卿等今年朕南巡閱河沿河百姓無不

稱頌靳輔所修工程極其堅固自明末流賊李自成決壞黃河之

後一經靳輔修築至今河隄畧不動搖皆其功也且開中河而糧

船免行一百八十里之險此可以尋常目之乎前後總河皆不能

及地方軍民俱有爲靳輔立碑之意但畏張鵬翮耳靳輔歿已十

餘年無有爲之舉奏者然功不可泯也○追贈江西殉難建昌府知府高天爵爲太僕寺卿諡忠烈從伊子浙江溫處道高其佩請也○諭戶部朕屢次視河南巡凡所過地方遇有各省漕船務加詢問備悉其長途輸輓之事每船額載糧米數百石全責成於旗丁旗丁管領重運遠涉江河經行數千里始抵通州身家性命攸關其責甚鉅及交納入倉時設有糧數不足則處分追賠定例極嚴既有懲創處分之例則不可無獎賞激勸之典如各營兵丁內有人材健壯勉力報效拔補將領者甚多旗丁中有歷運四五十一年者累歲積勞奉公若不定議敘之例則希榮無階眾丁何所鼓勵嗣後凡有領運照數全完者應令總漕獎賞若於額定糧數之外有多交者計算米數並領運次數議敘授以職銜庶各幫運丁皆踊躍自效而不肖之徒侵蝕虧損之弊可以漸止此朕破格優

恤旗丁裨益漕務之至意爾部卽遵旨會同兵部詳議定例具奏
○諭兵部國家綏輯兵民乂安海嶠必資威望素重之臣以畀干
城之寄有能久鎮巖疆實彰勞績者則錫命酬庸宜加顯秩福建
水師提督吳英當王師初定八閩白偏裨以至大將數厯四十餘
年比任提督以來益殫壯謀克修軍紀目前大將中明習水性訓
練舟師者罕與媿倫是用特沛殊恩俾膺異數著授爲威畧將軍
仍管水師提督事務以示朕優眷勞臣至意○諭吏部朕廩念河
防屢行親閱凡自昔河道之源流及厯來治河之得失按圖考蹟
靡不周知粵從明季寇氛決黃灌汴而洪流橫溢歲久不治迄於
本朝在河諸臣皆未能殫心修築以致康熙十四五年間黃淮交
敝海口漸淤河事幾於大壞朕乃特命靳輔爲河道總督靳輔自
受事以來斟酌時宜相度形勢興建隄壩廣疏引河排眾議而不

撓竭精勤以自效於是淮黃故道次第收復而漕運大通其一切經理之法具在雖嗣後河臣互有損益而規模措置不能易也至於勦開中河以避黃河一百八十里波濤之險因而漕輓安流商民利濟其有功於運道民生至遠且大朕每莅河干徧加諮訪沿淮一路軍民感頌靳輔治績者眾口如久而不衰夫人臣有大建樹於國家者獎勵酬庸宜從優渥雖賜卹易名已循彝典尙應特予褒敘賁以殊恩靳輔著加贈太子太保仍給世職拜他喇布勒哈番用彰朝廷追美勞臣之典爲矢忠宣力者勸

六月壬午朔以耿額爲刑部尙書

由左都御史遷

王國安爲兵部右侍郎

由奉天府府丞遷

阮爾詢爲左副都御史

田宗人府府丞遷

薦良爲理藩院右侍

郎由內閣侍讀學士遷

○丁亥 上巡幸塞外啟鑾○以巢可托爲左都御

史由刑部右侍郎遷

郭世隆爲湖廣總督仍革職戴罪效力

原任廣東廣西總督○

辛卯刑部奏秋審事得旨今年各省重罪人犯甚少可停其秋審直隸著照常審鞫○諭大學士馬齊坐糧廳赫芍色聲名惡劣運丁欠糧苦累皆由於此聞伊每船取銀八兩一年約得四五萬金赫芍色任坐糧廳十年則已得四五十萬矣朕之用彼原欲其作好官非令其圖利也是斷不可恕著革職鎖禁於城門又赫芍色如此乖張而倉場總督及都察院堂官科道官員何以並不劾參著一併問明回奏○丁酉以牛祐納爲刑部右侍郎溫察爲左副都御史由通政使遷○乙巳戶部等衙門遵諭議覆運丁運米三年多交米一百石者給九品頂帶交米一百石以上者遞加議敘上諭大學士等此事若照部議行則富人希圖官職多交餘米數次即可至一品矣朕命議敘運丁者並非欲多取其米也特使運丁知所勸勉交米不至缺欠之意今部議謬矣著將運丁內有運糧

三年多交米一百石者令注冊六年多交米二百石者令給以九品頂帶至運丁內有運米二十年不欠米者亦當議敘此事再議具奏尋議旗丁運米二十年雖無多交米石並無挂欠及過犯事故者亦應給以九品頂帶榮身從之○己酉諭大學士等朕觀醫書與儒書不同儒者之書皆言五倫之理作文據以發揮雖文之優劣各由乎人然其理總不出五倫之外若醫書開一方於前又列數方於後果此一方盡善則彼數方又何用乎以此揆之彼著醫書之人已自不能無疑也至服補藥竟屬無益藥宜於心者不宜於脾宜於肺者不宜於腎朕嘗諭人勿服補藥好服補藥者猶人之喜逢迎者也天下豈有喜逢迎而能受益者乎先年滿洲老人多不服藥而皆強壯朕亦從不服藥至使人推摩亦非所宜推摩則傷氣朕從不用此法朕之調攝惟飲食有節起居有常如是

而已